



KEMENTERIAN EKONOMI
JABATAN PERANGKAAN MALAYSIA

KENYATAAN MEDIA
BAGI STATISTIK IMBANGAN PEMBAYARAN MALAYSIA
SUKU TAHUN KETIGA 2023

Imbangan Akaun Semasa Malaysia mengekalkan lebih sebanyak RM9.1 bilion, dengan peningkatan barangan, pemulihan dalam Perjalanan *inbound* dan peningkatan pelaburan asing

PUTRAJAYA, 17 November 2023 – Imbangan Akaun Semasa (CAB) Malaysia pada suku tahun ketiga 2023 meningkat marginal sebanyak 0.3 peratus suku ke suku untuk merekod lebih RM9.1 bilion, bersamaan 2.0 peratus daripada Keluaran Dalam Negara Kasar (KDNK). Sementara itu, **Akaun Kewangan** berubah kepada aliran masuk bersih RM14.9 bilion berbanding aliran keluar bersih RM11.6 bilion pada suku sebelumnya. Dalam tempoh Januari hingga September, CAB mencapai lebih RM22.5 bilion, manakala Akaun Kewangan merekodkan aliran masuk bersih RM1.0 bilion. Jabatan Perangkaan Malaysia (DOSM) hari ini melaporkan dalam **Statistik Imbangan Pembayaran dan Kedudukan Pelaburan Antarabangsa bagi Suku Tahun Ketiga 2023** yang mengukur transaksi merentasi sempadan Malaysia dengan seluruh dunia.

Mengenai komposisi Akaun Semasa, Ketua Perangkawan Malaysia, Dato' Sri Dr. Mohd Uzir Mahidin berkata, “Lebih CAB pada suku tahun ketiga 2023 sebahagian besarnya disokong oleh eksport bersih Barangan yang lebih tinggi, diikuti defisit yang lebih rendah dalam Perkhidmatan dan akaun Pendapatan sekunder”.

Perbandingan bagi suku tahunan, eksport bersih **Akaun Barangan** mencatatkan peningkatan pada suku tahun ketiga, melonjak RM32.7 bilion daripada RM29.5 bilion pada suku sebelumnya. Eksport Barangan meningkat 2.2 peratus berbanding suku tahun kedua 2023 untuk merekodkan RM260.4 bilion. Eksport utama ialah barangan Elektrik & elektronik (E&E), Keluaran petroleum dan Bahan kimia & keluaran kimia, terutamanya ke Singapura, China dan Amerika Syarikat (USA). Begitu juga, import Barangan turut menunjukkan peningkatan 1.0 peratus suku ke suku untuk mencapai RM227.7 bilion, terutamanya disumbangkan oleh barangan Perantaraan. China, Singapura dan USA adalah sumber utama import”.

Melihat kepada prestasi perdagangan Perkhidmatan, Ketua Perangkawan Malaysia menyatakan bahawa **Perkhidmatan merekodkan defisit yang lebih rendah** RM10.3 bilion pada suku ketiga 2023, terutamanya disumbangkan oleh pemulihan yang konsisten dalam perjalanan *inbound* yang bermula pada suku yang sama tahun lalu. Eksport Perkhidmatan meningkat sebanyak 5.9 peratus suku ke suku untuk merekod RM50.6 bilion. Sementara itu, import Perkhidmatan menunjukkan trend yang sama, dengan pertumbuhan suku tahunan yang sederhana sebanyak 3.1 peratus, berjumlah RM60.9 bilion. Lebihan perjalanan berada pada RM5.4 bilion pada suku ini, menunjukkan peningkatan ketara sebanyak 41.6 peratus berbanding suku sebelumnya. Komponen lain yang menyumbang kepada defisit yang lebih rendah adalah Pembinaan, Caj harta intelek dan Perkhidmatan kewangan.

Dari sudut pendapatan, akaun **Pendapatan primer** mencatatkan defisit yang lebih tinggi sebanyak RM11.0 bilion berbanding RM6.3 bilion pada suku sebelumnya. Sementara itu, defisit dalam akaun **Pendapatan sekunder** mengecil daripada RM2.8 bilion kepada RM2.2 bilion pada suku ketiga 2023.

Ketua Perangkawan Malaysia turut menambah, “**Akaun Kewangan** merekodkan perubahan arah aliran daripada aliran keluar bersih RM11.6 bilion pada suku sebelumnya kepada aliran masuk bersih RM14.9 bilion pada suku ketiga 2023. Perubahan arah aliran ini terutamanya disumbangkan oleh aliran masuk dalam Pelaburan Lain pada RM34.6 bilion berbanding suku sebelumnya disebabkan oleh pinjaman antara bank yang lebih tinggi oleh residen dengan institusi kewangan di luar negara. Pada masa yang sama, Pelaburan Portfolio berubah kepada aliran keluar bersih sebanyak RM14.1 bilion disebabkan langganan sekuriti ekuiti dan bon asing oleh residen. Selain itu, Pelaburan Langsung turut mencatatkan aliran keluar bersih lebih tinggi sebanyak RM6.1 bilion disumbangkan oleh ekuiti dan dana pelaburan saham.”

Aliran keluar bersih dalam **Pelaburan Langsung Malaysia di Luar Negeri (DIA)** meningkat kepada RM13.4 bilion berbanding RM8.0 bilion pada suku sebelumnya. Penyumbang utama kepada DIA ialah sektor Perkhidmatan khususnya dalam aktiviti Kewangan, diikuti oleh sektor Perlombongan & pengkuarian dan Pertanian. Tiga destinasi utama DIA ialah Indonesia, Angola dan Viet Nam. Pada masa yang sama, **Pelaburan Langsung Asing (FDI)** mencatatkan aliran masuk bersih yang lebih tinggi RM7.2 bilion berbanding RM3.1 bilion pada suku sebelumnya. Penerima FDI terbesar ialah sektor Perkhidmatan terutamanya dalam aktiviti Kewangan dan Perlombongan & pengkuarian. Hong Kong, China dan United Kingdom merupakan sumber utama utama FDI.


Pada akhir suku tahun ketiga tahun 2023, kedudukan pelaburan terkumpul bagi **FDI** dan **DIA** masing-masing ialah RM914.9 bilion dan RM659.6 bilion. Jumlah kedudukan aset kewangan mencatatkan RM2,399.5 bilion manakala jumlah liabiliti RM2,296.3 bilion. Ini menjadikan **Kedudukan Pelaburan Antarabangsa (IIP) Malaysia** merekodkan aset bersih RM94.9 bilion, manakala **Rizab Antarabangsa Malaysia** berjumlah RM517.1 bilion.

DOSM telah melancarkan OpenDOSM NextGen sebagai medium yang menyediakan katalog data dan visualisasi bagi memudahkan pengguna menganalisis pelbagai data. OpenDOSM NextGen ialah platform perkongsian data sumber terbuka dan boleh diakses melalui portal <https://open.dosm.gov.my>.


DOSM akan menjalankan Banci Pertanian pada tahun 2024. Mohon layari <https://www.myagricensus.gov.my/> untuk maklumat lanjut. Tema adalah “Banci Pertanian, Kunci Kemajuan Pertanian.”

Kerajaan Malaysia telah mengisytiharkan Hari Statistik Negara (MyStats Day) pada 20 Oktober setiap tahun. Tema sambutan MyStats Day adalah “Statistik Nadi Kehidupan”.


Carta 1: Imbangan Akaun Semasa, 2010-2022 dan ST1 2019 – ST3 2023




Carta 2: Peratus CAB kepada KDNK, 2010-2022 dan ST1 2019 – ST3 2023




Carta 3: Eksport Perkhidmatan, 2010-2022 dan ST1 2019 – ST3 2023




Carta 4: Perbelanjaan Pelawat Asing di Malaysia dan Pelawat Malaysia ke Luar Negara, 2010-2022 dan ST1 2019 – ST3 2023




Carta 5: Pelaburan Langsung Malaysia di Luar Negeri (DIA) Aliran dan Kedudukan, 2010 –2022 dan ST1 2019 – ST3 2023




Carta 6: Pelaburan Langsung Asing (FDI) di Malaysia, Aliran dan Kedudukan, 2010 –2022 dan ST1 2019 – ST3 2023




Paparan 1: Pelaburan Langsung, ST3 2023




Carta 7: Kedudukan Pelaburan Antarabangsa (Bersih), 2010 – 2022 and ST1 2019 – ST3 2023




Carta 8: Kedudukan Pelaburan Antarabangsa (Jumlah Aset dan Jumlah Liabiliti), 2010 – 2022 and ST1 2019 – ST3 2023



Carta 9: Aset Rizab Antarabangsa (Bersih), 2010 – 2022 dan ST1 2019 – ST3 2023



Carta 10: Aset Rizab Antarabangsa (Pada akhir), 2010 – 2022 dan ST1 2019 – ST3 2023



Dikeluarkan oleh:

PEJABAT KETUA PERANGKAWAN MALAYSIA

JABATAN PERANGKAAN MALAYSIA

17 NOVEMBER 2023